

MÉIFODO SAN PABLO CORINTO IMACIMO ORÉCABE

Segunda Carta del Apóstol San Pablo a los Corintios

Coríntomo ite Juzíñamuimo jaináidinomo Pablo cuete

1 ¹Páblodicue. Juzíñamui começi jítaina izóí Jesucristo orécamiedicue. Timoteo cue diga illa llezica, Coríntomo ite Juzíñamuimo jainaide ámatiaimo bibe cueticue. Daje izóí Acaya éniemo ite nana Juzíñamuimo dúidinomo bibe cueticue. ²Cai Moo Juzíñamui, cai Ocuíraima Jesucristo diga ómoína ñue éziciiteza. Afe llezica ñue uái illano dibénemo Juzíñamui Jesucristo diga ómoína jóoneiteza.

Pablo duere zefuállafue

³Cai Moo Juzíñamuina ióbitaredicai, mei afémie caina dúeruite Mooza. Daje izóí afe Juzíñamui iere caimo dúecaifirede. Afémie cai Ocuíraima Jesucristo Moo. ⁴Nana duere cai zefuilla llezica, afémie caimo dúecaifirede. Afémie caimo dúecaide, afe izóí jíáie duere zefuídínomo cai dúecaillena. Afemona Juzíñamui caimo lloga dúecaillafue jíáímacimo llóredicai. ⁵Mei Cristo duere zefuállafue dibénemo cai nabaia izóí, afe izóí Crístodo caimo iere ie dúecaillafue jeire óiticaí. ⁶Ie jira, ñibai dama duere cue zefuía, bie ómoína cue canóllena. Iemo ñibai Juzíñamui cuemo dúecaiaidi, áfedo daje izóí dúecaillafue, naa jíllonafue diga óitíomoi. Iemona daje cuemo comuide duere zefuállafue ómoímo comuíadi, raíre járitaiñeno áfemo fia ocuíriredíomoi. ⁷Omoi dibénemo uáfodo onóigafuemo ñue ínoticue, mei ñue onódicueza daje zefuállafue dibénemo omoi illa dieze, afe izóí Juzíñamui fecaca dúecaillafue óitíomoiza.

⁸ Amatai, Asia éniemo cuemo comuide féiredifuiaina ómoimo fidítaiacadie. Afénomo cuemo comuide riirede facátafue iere jamánomoideza, áfena ocuínidie. “Nibai bífuemona jíllñoeno benó tíiticie,” daiífiredie. ⁹ Aféruimo méinellena llavécamié abi izói cue abi cacaide. Mei íadi tíidino meine abido cáatate Juzíñamuimo cue ínuana cue onóillena, afe zuufue cuemo comuide. Dama cue abí íñoëillena cue llófuete. ¹⁰ Aféruimo Juzíñamui afe iere jacírede tíllafuemona cuena jíllotate. Afémie nai birui jaca cuena jíllotaicaide. Daje izói úreitiruillaido afémie aféfuemona cue jíllotallemo ocuírcaidie. ¹¹ Uáfuenta, cuedo Juzíñamuimo omoi jíacíreiaidi afémie cuena jíllotaite. Aillo comini cuedo Juzíñamuimo úriadi, aillo íena íóbitaitaioi. Juzíñamui cue ézicia núefuiaiíri íena íóbitaitaioi.

Pablo Coríntomo jáíñenafue llote

¹² Daa cue comécido onóigafueri iere íóbidie. Afefue bie izói jóide: cue comeci úrilla uai nífuenino bñiedo cue mácajana llote. Daje izói Juzíñamui eróicana jíáimana jífueñoeno cue mácaja llote. Omoi cígiri bie izói riire iticie. Juzíñamui caimare cue cánuado daí iticie. Dama cue fibíllafuedo daí íñédie. ¹³ Omoimo cue cuezábiaimo báinino lloga uaina íñede. Omoi facádoia onóille raa ja uáfodo ciega.

Nane jíáifuena ñue omoi onóillemo ocuírídie. ¹⁴ Aféfuena jabo onódiomoi. Afefue bie izói dáiacade: Cai Ocuíraima Jesús billíruimo ómoiri caimare abi cue ínuana izói, afe izói cueri caimare abi ínoitiomoi.

¹⁵ Nana bífuiaí iere cue jíeruillamona, omoi eróizaillena fueñe mamériticie. Daí ménacaiño omoi cue éroizailleri íóbitiomoi. ¹⁶ Macedonia éniemo cue jaille llezica omoi jarire cue méínonocaillena comeci facádie. Afe mei Macedóniamona abido cue bille llezica nane dáanomo omoi cue éroizaillena mamériticie. Afe daí afe méifomo judéamo cue jaille llezica cuena cánoitiomoiza. ¹⁷ Bie cue mamérillaífuiaí comeci cue faca llezica, ¿cuena nibai jíáifodo raire méidofiredimie izoide daidíomoi? Bie éniemo ite fiénidino mamérilla izói nibai cuena mamérite daidíomoi. Afémaci “Jii” daidíaioi; íemo méifodo daje llezica “Dama ite” daiífirediaioi.

¹⁸ Mei íadi Juzíñamui uáfuenta daiífiredimie illa izói, afe izói táinona “Jii,” íemo “Dama ite” dáaruido ómoína daiífinidie. ¹⁹ Mei Juzíñamui Jitó Cristo Jesús jaca táinona “Jii,” íemo “Dama ite” dáaruido daiífinideza. Iemo Silvano, Timoteo, íemo cue, Cristo daína uaillaí omoi cígiri lloticaí. Nana Cristo lloga uai táinoñedeza, ua uai. Ie dáinana méidofinide. ²⁰ Mei afémiedo nana Juzíñamui uícodo llogáuai ñue jaícina zúideza. Ie jira Juzíñamuina cai íóbitaja llezica, Cristo Jesudo “Daítadeza” daiífiredicaí. ²¹ Iemo jíái Juzíñamui ómoína naa cairi Crístomo riire jaináitate, nana cai ínogafuemona oni jíáifodo cai báíñeillena. Daje izói afémie ie

táijinafuemo ñue caina jónete. ²² Juzíñamui ie Ñuera Joreño caimo íllado caina dama íeiena mamede. Afe ie Ñuera Joreño caimo íllamona ico jáíruido Juzíñamui caimo fecállifuena cai llínollena uáfodo onódicai.

²³ Mei jiáifuemo omoi coméciiri. Omoína duéruiticueza, ómoína duere cue fínoñellena, úcodo cue mamérilla izói nai ómoímo biñédicue. Juzíñamui afe bie cue uaina nabáillena jicádícue, aféuai uafue daiñllena. Cue daina uai uáfueñenia, Juzíñamuina abí fatátaiticue. ²⁴ Omoi fínogafuena riire ocuíañaedicue, mei omoi fínogafuedo Jesucrístomo ñue riire jaináidiomoiza. Mei jiáífodo conímamo táijina izói, omoi iere aillo ióbillena ómoína canócadícue.

2 ¹ Ie jira omoi cue zúucaitaibiñellena mamériticue. ² Mei omoi zúucaitadicuena ¿mei bu cuena ióbitalle? Cue zúucaitadino dani cuena ióbitalle, mei íadi cue dinena ómoína zúucaitaacañedicue. ³ Ie jira nauí ómoímo cue ciegábemo cue daina izói cueticue. Omoína zúucaitaibiacañedicue. Mei jiáífodo cuena ióbitarediomoi. Mei nauí aféruimo uáfueña onódicueza, cue caimare illarui omoi caimare fítioimoiza. ⁴ Omoímo nauí cue orécabe cue cuia llezica, iere cue comeci zúurenari éedicue. Mei íadi omoi zúucaillena afévena cueñédicue. Mei jiáífodo ómoína iere cue izíruillana omoi onóillena cueticue.

Fieni finófiredimie ie illafue múiñua mei, meine caimare uáidua

⁵ Mei íadi ómoímo riire úriacañedicueza bie izói dáititícue. Dámie fieni illa dama cuena zúunaitañedeza, mei jiáífodo cue baimo nana ómoína zúunaitade. Daií daidícue iere riífueña jáiñeilleza. ⁶ Omoi gairilla llezica afe cómemo omoi mameca duere finóllífue ja figo báiteza. ⁷ Mei benómona afémiemo jiáífodo úrirediomoi. Nauí ie finoca fiénidífue omoi féitano caimare íena omoi uáidori. Daje izói íena dúecairediomoi, aillo ie zúunaillamona afémie jamánomo anado fieni jáiñeilleza. ⁸ Ie jira ómoímo izire jicádícue, afémie omoi izíruilla meine abido íemo omoi onótallena. ⁹ Nauí úcodo bifue dibénedo ómoímo cueticue. Nauí omoi cue llófuiana nibai jeire óitiomoi, nibai jeire óñeitiomoi; áfena cue onóillena ómoímo cueticue. Daje izói, omoi comeci ífue onóillena afébedo ómoína facátatícue. ¹⁰ Mei ja benómona, ómoína fieni finódimie omoi caimare uáidoia, cue daje izói caimare íena uáidotícue. Meita afémie fieni fínuado cúemona ñino féitalle fiénidino íadi, aféfuena féitaticue. Uáfueza ñue ómoína canóllena Cristo eróicana aféfuena féitaticue. ¹¹ Mei afe zúunaitagamie raire abido íena caimare uáidoredicaiza, afe zúufuedo Taiíe raire íena ana úiñeillena. Mei Taiíe comínina bífuefirena uailai ñue onódicaiza.

Pablo Tróasmo uái iñénafue

¹² Jesucristo lloga uai Troas jófuemo jino cue lluíbillena llezica, cai Ocuíraíma áillomaci cuena jíeruitajamona Juzíñamui cue ocuilla

táijinafuena uáfodo caimare fuitáredicue. ¹³Mei íadi Coríntomona bíacade cue ama Tito afémie cue cióñenamona cue comeci uái ñede. Mei jira Troas imácina facádonocaillano, oni Macedonia éniemo íena júnuaidicue.

Jesucrístomo cai jaináinamona buna anáfenoñegacai

¹⁴Juzíñamuina iere figura daiífiredicai; mei Cristo nana eóidinona anáfenua izói, Juzíñamui dáfeodo, Cristo diga, nágaruillaído caina úicaiteza. Afe llezica ziórede raa caimare jállia izói, afe izói Juzíñamui Crístona onóillifuena caído nágagobiaído jica jalléitate. ¹⁵Cristo Juzíñamuimo fecaca ziórede uguci izóidinodicai. Nana jíllaitinomo jallédicai, daje izói niné féiraitinomo jallédicai. ¹⁶Afe niné féiraitinomo titade jucui izói íaire jállecaide. Mei íadi jíllaitinomo caimare íocire cáatate jállia izói jállecaide. Bie Juzíñamui ebire mamérillafue, ¿bífuena bu mei ñue llíñorena? Juzíñamui cuena cánua izói canóñenia jaca buna figo llíñonide. ¹⁷Juzíñamui uailai jíáimacimo fécano úcubena llíñoñedicue. Afena jaca raiñoñoeno llócaidicue. Jiáimaci úcube óllena afe uai jíáífodo méidua izói méidoñedicue. Mei jíáífodo Juzíñamui orécamié izói, afémie eróicana jíáima jífueñoeno uáfodo úriticue.

Juzíñamui comue ñue finóllifue bie izói daide

3 ¹Bie izói cue úrilla, ¿ómoimona nie izói cacaide? Nibai ¿dama cue abi finollena meine dáanomo ñue úriticue? Mei íadi daiítañede. ¿Nibai cue ñue illánona onótatibiai ómoimo izáirede? Mei nibai jíáimaci fñua izói, ¿ómoimona cue ñue illánona onótatibiai jicárede? ²Mei daiítañedeza. Dani omoi cue ñue illánona onótatibe izóidiomoi. Omoi baimo jíáie onótatibena jítaiñedicue. Cue comécimo joide come ñue illánona onótatibe izóidiomoi. Aféuaina nana comini cúemona onórediaioi. ³Dama Cristo cuela onótatibe izóidiomoi. Cuedo ciegábiai izóidiomoi, mei cuedo ñúefuena llotátagaomoiza. Jamai títado ciegabe izóíñediomoi; mei jíáífodo caade Juzíñamui Ñuera Joréño uicaiganodiomoi. Daje izói Moisés nofícomo ciegáuai fia comini eróicana jeire onédiomoi, mei íadi omoi comeci úrillado Juzíñamuina ióbitaacadiomoi.

⁴Nana afe bie ñuera cue dáinana jacíruiñoeno daiíredicue, mei Crístodo Juzíñamuimo daa uai fiéñoeno fínofíredicueza. Uáfueza, nana cue dáinana afémie ómoimo zúitaiteza. ⁵Mei íadi nana cue jetáacagafuiai finolle ríino dama cúemona comuñedeza; mei jíáífodo nana cue finócafuiái Juzíñamuimona comuide. ⁶Ie lloga comue finóllifue mo cue táijillena, afémie ñue cuena ríinoretade. Afe Juzíñamui comue finóllifue, jaiái cuela ocuífue jeire cai úado caimo zuitánide. Mei jíáífodo Ñuera Joreño comuítaga cai comeci ziiñoena cáatatino caimo íllado, Juzíñamui

comue finóllifue caimo zuitárede. Afe cuega cai ocuilla uai cai titállena llote, mei íadi Ñuera Joreño cai comécina cáataite.

⁷Afe Moisés lloga ocuilla uai nofici finóinabicimo cuega. Aféuai lluáibilla llezica, iere riire ebíredifuiaido lloga. Aféruido Israel nairai, mei Moisés uiéco jíáfodo iere quenire eróideza, afémiemo eróinidiaioi. Mei íadi afe riire ebíredifue fíaicana dúioicaide. Iemona afe ícoimo cai titalle ocuilla uai lluáibilla llezica iere ebíreia, ⁸Ñuera Joreño caimo lluáibiga uai, ua afe titade uai baimo jamánomo ebírede. ⁹Bifue bie izói dáiiacade: mei cai fiénidifuiaimona cai titállena llote ocuilla uai iere ebíreia, birui aféuai baimo nífuenino cai íllena Juzíñamui llogafue jamánomo ebírede. ¹⁰Afe ocuilla uai nauí iere ebírede, mei íadi Juzíñamui como finoca jamánomo ebíredifue comuállamona, afe nanoide ocuilla uai jae figo ebínide; ja birui ráañede. ¹¹Iemona nauí lloga are íñeno raire záitífue ebíredenia, afe zíiñona záíñeitífue nauí llogáuai baimo jamánomo ebírede.

¹²Ie jira afe bífuemo ocuírillano, jacíruiñeno caimare úriticue. ¹³Mei íadi cue bie Moisés fínua izói finóñedicue. Afémie uiéco quenire cioina are íñedeza féibicaide. Ie jira afe quenire cíoide dúillana Israel nairai cíoineillena, Moisés ie uiéco íñiroina ibaide. ¹⁴Mei íadi dama Moisés uiéco íbaina llezica afe nairai, uina cíoñedino izói, íaioi ífoci úrilla figo déíñede. Birui afe jaiái llogafue íaioi facádua llezica, afe íbaille íñiroi izóidífue íaioi onóillífueña jánaide; mei afe íbaille íñiroi izóidífue nai oni óñegaza. Afe jizítatífue dama Cristo oni órede. ¹⁵Nai biruimo Moisés cuegánicuai íaioi facádoia, afe íbáíraroi íaioi ífoci úrillana féítaoicaide. ¹⁶Mei íadi dáamie cai Ocuíraimamo íñoia, afe íbáíraroi oni oga. ¹⁷Cai Ocuíraima afe íaioina zíiñona cáatate Ñuera Joreño. Afe ie Ñuera Joréñomo jíeruitimie fiénidena fínuamona ráiruíñegamiéna jáite. Daje izói afe Ñuera Joréñodo cai Ocuíraimamo ínote come, Moisés ocuica uáimona ráiruíñegamiéna jaide. ¹⁸Mei íemona cai uiéco íbáíllaroi izóidífue íñedeza, uáfori cíoide acárani izóidínodicai. Afemona, cai Ocuíraima ebíredifueña acárani egáíñua izói, jíáímamo ja ciótaticai. Afe daíí cai bie Cristo izóioicaidicai, mei nágaruillaído ie ebíredifueña jamánomo náamatafiredicaiza. Bifue cai Ocuíraima finócafue. Afémie Ñuera Joreño.

4 ¹Afemona cue bie jaca comécina náinidino izóíñedicue, mei Juzíñamui cuena dúecaillano bie tájjinafue cuemo jóoneteza. ²Báinino jíáíma jífuefírenana ruíffruiticue naa jíáie meáiredífuaíri. Daje izói jíáíma caimare bífuia uaido úriñedicue. Afe llezica Juzíñamui uaina méidota jíáífodo lloñedicue. Mei jíáífodo jaca uáfuedo úriticue. Afedo Juzíñamui eróicana nana comíni comeci ñue úrillado afe cue lloga ua uaina íaioina jíeruitadicue. ³Mei íadi cai llócaiga jíllona uai comíñimona nano nígamiemo nai ónonino cacaide. Afefue daíí ite,

mei afémaci dani nine íaioi táinocaillifuemo jáideza. ⁴Mei afémaci Juzíñamuimo íñoñenamona bínie naama Taife, ui nirilla izói, íaioi ifoci úrilla uaina féitate, cue lloga comini jíllotata ebírede Cristo ñúefuena íaioi ónoñeillena. Afe ñúefue ñue úzere egáñnote raa izoide. Iemo afe Cristo Juzíñamuina jino uáfodo ñue onótate cáadímie. ⁵Jino cue llócaina llezica, dama cue abi íena lloñédicue, mei jíáifodo afe Jesucristo cai Ocuíraima llócaidicue. Iemo cue dibénedo Jesuna cue izíruillamona ñue omoi íllena canódimiedicue daiífiredicue. ⁶Mei Juzíñamui énie comútaja llezica, afémie “Mai batí jítino egáñuairi” daide. Afe daií daidímie, cue comécimo ie ñúefue egáñua izói jóonete. Afémie daií cuemo jóonete, Crístodo cuemo ácataga Juzíñamui ebírede cáimafuena ñue cue onóillena.

Juzíñamuimo ñue cai ínuado cai illafue

⁷Mei íadi afe Juzíñamui ráifide cáimafue cue zíñona íñeite abido onótacague. Bie cue abi are íñeite énie niina iciru izoide; mei íadi afe ñúefuena méidotarede íno bie cue jamai abimo jóonega, afe ríno dama cúemona comúñenana omoi onóillena; íemo jíáifodo afe ríno Juzíñamuimona comúllana omoi onóillena. ⁸Daií cue íllamona diga féirede finónidífuiaí cuemo comúadi, jaca Juzíñamui cánuado aféfuiaí ñúeite. Daje izói aillo ónonidífuiaí zuure cuemo comúadi, jaca nai ocuíríñedímie izói íñédicue. ⁹Mei jíáimaci cuena duere finóllena cuemo racáadi, jaca zóofeñegacue. Fáinamona ana dotaca izói iticue íadi, jaca niné táinocaiñédicue. ¹⁰Náganuiaimo cue jailla llezica, Jesús íaioi fállena mámia izói maméfiregacue. Nágaruillaído afe titállena mamécamié izói cue illa llezica, afémie ñue cuena náiretade, birui ie cáananona jino comínimo cue onótallena. ¹¹Mei nai cue caana llezica, nágaruillaído Jesús ícoínia jacire titállena mamécacue, Jesús cáanana, are íñeno tíite cue abido cíotafireillena. ¹²Daií cue zefuíllamona cue dibénedo títaigamiéna jáitícue, mei íadi omoi dibénedo dáaruído omoi cáataganona jáitíomoi.

¹³Juzíñamui Cuegáuaimo dáamié duere ie zefuíbicailla llezica daide: “Juzíñamuimo ínoticue ie jira úriticue.” Mei daií cue jíái afémie ínuua izói ínoticue, ie jira Juzíñamui ñúefuedo úriticue. ¹⁴Ñue onódicueza, afe tíide Cristo meine abido cáatate Juzíñamui, afe cáataga Jesúsóiri nane cuena cáataite; íemo daane cue, naa ómoiri, ie illánomo úite.

¹⁵Nana bífuiaí ñue omoi íllena daií íficaide. Iemona nai aillo jíái comínina Juzíñamui ñue éziciite. Aillo ie ézicia izói afe dieze aillo comini jamánomo ñúefue íemo nítaitiaioi.

¹⁶Mei íemona cue jaca comécina náinidíno izói íñédicue. Meita cue abi náinioicaide íadi, cue comeci díkena jaca nágarui náireioicaide. ¹⁷Mei íemona bíniemo cue caana llezica duere cue zefuíllafuiaí figo

ráañede. Raire llícaite. Ie méifomo afe zuufue baimo ite aillo ninomo fúíñeite ebírede cáimafuiai cuemo cómuite. ¹⁸Ie jira uído cue ciónamo ébicañedicue; mei íadi cue ciónenafuiaiimo ébicañefiredicue, mei afe ciona raana are iñeno raire táinocaiteza. Mei íadi afe ciónena raa jaca zíiñona íite.

5 ¹Ja ñue onódicueza, cue caana abi are iñeno zabide jofo izoide. Iemo jiái onódicueza, bie cue abi táinocaille llezica, Juzíñamui cúeiena monamo zíiñona zábiñeítico ja nite; afecho come ónoído níñega. ²Uáfueza, cue caana abido cue illa llezica, monamo itícomo iere cue jáiacana comécido éfiredicue. ³Afénoimo jaiániacadícue, mei afecho iniroi come abi jífua izói, cue joréñona ñue jífoiteza. Afemona come abimo iñede joréñona íñeíticue. ⁴Bie jofona mameca abimo cue illa llezica iere zúunaillano comue abina izire óiacadícue. Mei, bie cue jácaie abina, iniroi come abímona duñua izói, cue joréñomona duiñocañedicueza; jífoñega joreño izói íacañedicueza. Mei jiáífodo iniroi jita ízoi, comue cue abi cue joréñoimo jítáacadícue. Daí cómuena méidoacadícue, bie cue táinocaite abi, comue cue cáaillinodo nine féitallena. ⁵Dama Juzíñamui bie izói abi cue méidollena cuena mamede. Iemo birui ie Ñuera Joreño afémie cuemo fecade. Afe ie Ñuera Joreño cuemo íllado ñue onódicueza, nana Juzíñamui cuemo fecalle ñue llíñoíticue.

⁶Mei áfemona, comue méidoga abi cue llíñollena áfena ñue cue onónamona caimare ocuúridícue. Nai bie abido cue illa llezica, onódicueza, monamo cue illícomona jino iticue. Bie izói daina cue Ocuíraíma díga íñedicue. ⁷Afe llezica birui fia cue ciónafuedo ínidícue, mei jiáífodo Juzíñamuimo cue ínogafuedo íredícue. ⁸Mei jira uáfueña cue llíñollena ñue cue onónamona caimare ocuúridícue. Bie cue illa abina fáicanocaiacadícue, monamo jaillano cai Ocuíraíma díga cue íllena. ⁹Ie jira bie éniemo afémie díga cue iñena llezica, daje izói afémie díga cue illa llezica, jaca fena cue íóbitallena jamánomo nícidotícue. ¹⁰Mei comini finócafue Cristo riire jicánoranomo nana cai afénoimo ácataredícaiza. Afénoimo illa dígamie bíniemo illa abido íaioi fínua díeze, nibai ñúefue nibai fiénidífue, áfeze jírídoítiaíoi.

Juzíñamui meine caina caimare uáiduafue

¹¹Ie jira afe naga come Juzíñamui riire jicánollemo ñue jacíruioicana comeci facadícue. Afemo cue coméciillamona naga cómena Juzíñamui llógamo jíeruitaacadícue. Mei íadi cue illáfueña Juzíñamui onode. Afe izói cue ñue illáfueña omoi onóillemo ocuúridícue. ¹²Dáanomo dama ñue cue illáfuedo úriñedicue. Mei jiáífodo cuedo caimare omoi úrillena bie izói ómoína daidícue. Afemona jínoidífuedo abí ínotino uai omoi ollúuai íteza. Afémaci jofo comécimo itífuena náfueñediaíoi. ¹³Mei nibai comínimona dáarie cuena daina izói, uáíritaidímie izói iticue íadi,

Juzíñamui íena daí iticue. Mei jiáifodo uáiritañedicueza ñue omoi íllena canódicue. ¹⁴Mei ñue onódicaiza dama Cristo dainámie nana comini meífomo tíide. Afe caina ie izíruillamo coméciillano, nana afémiemo finotino íaioi fiénidifuiái tíidena mámano áfena fáicanocaidiaioi. Afemo cue coméciillado Cristo caina izíruilla ñúefuena cuena izire llócaitate, ñue omoi íllena. (Daje izói bie Cristo caina izíruilla, ñue illáfuedo cue jáillena cuena ocuíoideza.) ¹⁵Uáfueza, Cristo nana comini meífomo tíide, nana cáadino dani íaioi jitailla izói íñeillena; mei jiáifodo, afémaci dibénedo tíillano meine cáadímie Cristo comeci jitailla izói íaioi íllena. ¹⁶Ie jira bínie comini jínoidifuedo comeci faca izói, nino bumo comeci facáñedicue. Mei nauí uícodo Crístomo bínie comini comeci faca izói, comeci facádícue, mei íadi ja biruí daíí afémiemo comeci facáñedicue. ¹⁷Mei daíí, Crístomo dájena jaináitagamie comue cómena jaide. Jaiai ie illáfuiái fiénocaillano nágafuiái cómofuiaina méidoga.

¹⁸Nana bífuiái Juzíñamui mámiama Juzíñamui dama afémiemona Crístodo meine caimare cuena uáidote, íemo jiái nana comini afémiemo meine caimare úritallena cuena ocuñocaide. ¹⁹Bie izói daííacana: Juzíñamui ie Jitó Crístodo nana comínina íena meine caimare uáidotade. Aféruimo, comini finoca fiénidifue féitano caimare íaioina uáidote. Afe dáruido Juzíñamui meine comínina caimare uáiduafe oni llujáillena cuena jónenocaide. ²⁰Afemona Cristo íena uai llotínona ómoímo biticue. Ie jira biruí ómoína cue daina uai, dama Juzíñamui ómoímo cuedo jicaca uai izoide. Mei jira Cristo dibénedo ómoímo izire jicádícue. Mai, meine abido Juzíñamui caimare uáidori. ²¹Afe Cristo jaca íaifuena finóñede. Mei íadi cai meífomo Juzíñamui afémiena fiénidifuiairedímie izói duere finode. Daíí íena finode, Juzíñamui anamo ñue jaícina illáfue mo cai íllena; mei ie ñue illa izói cai íllena Juzíñamui jítáideza.

6 ¹Afe daíí Juzíñamui tájijnamo afémiena nabáidícue. Ie jira afémie ómoímo lloga ñuera cáimafuiái táinomo omoi fáifitañeno iri. ²Mei Juzíñamui ie Cuegáuaimo daide:

Comínimo caimare cue uáidollena cue mamécaruimo ona cacádícue. Daje izói jíllonaruímo ona canódicue.

Ja biruí Juzíñamui caimare o uáiduaruí. Daje izói biruí o jíllonaruí.

³Iemona Juzíñamuimo cue tájijina llezica, buna llótáidonidicue, cue tájijnafuemo fiéni íaioi úriñeillena. ⁴Mei jiáifodo nana cue jetáacagafuiáido Juzíñamuimo tájijidímie cue íllana ácataacadícue. Duere zefuídícue íadi comécina raire járidoñeno fia ocuídícue. Afedo Juzíñamui íena cue íllana jino ácataticue. Daje izói cue jitaica raa íñena llezica, íemo llotáiredifuiái cuemo comuilla llezica áferi járidoñeno ocuídícue. ⁵Daje izói cuena zechénuano llavédaioi. Cue duere finóllena jacire lléjellejedino cígiri iticue; íemo iere riírede tájijnamo iticue. Díga ícaíño raire íniana onóñedicue; daje izói jiái jufíruiticue. ⁶Daje izói íáinidimiena cue íllado

Juzíñamuimo ñue táijidimiena cue íllana ácataticue. Iemo diga jiáifuiaido daí cue íllana ácatafiredicue. Uafue uaina cue onónado ñue cue illáfueña ciotaticue. Iemo cue járitañenafuedo naa cue dúcaifirenafuiaido áfena ciotaticue. Iemo jiái Ñuera Joreño cuemo íllado, naa jiáimana jífueño cue izíruifirenado Juzíñamui íena cue íllana ácatafiredicue. 7 Iemo ua uai cue llócaillado, naa Juzíñamui ríno cuemo íllado: nana bífuiaido Juzíñamuimo ñue táijidimiena cue íllana ácatafiredicue. Afe llezica jaícina joide illáfuedo jáifiredicue, mei áfedo fiénide uállaina oni caitáredicueza. Daje izói áfedo cue abina ríidoredicueza. 8 Daruúrie ñúfuiaí cuemo nitádiaoi, mei jiáiruido fiénidifue cuemo jitádiaoi. Daje izói jiáiruido cuedo ñue úritiaoi, íemo jiáiruido cuena íáiruitiaoi. Iemo dáríe cuena comínina bífuetimiena daidíai; mei íadi jaca uáfueña úricaidimie itícueza. 9 Iemo dáríe cuena “Bu ónoñegamedio” daidíai; íemo jiáimaci “Ñuera cai cómedio” daidíai. Daruúrie titácamié izói iticue, íadi nai cáaoicadicue. Íere duere finócacue íadi méineñegacue. 10 Zuure iticue íadi jiáifodo jaca íóbidicue. Mei ráanidimiedicue íadi, aillo jiáimacina ráaredino izói ráanaitadicue. Dúeredino jofófemo dúeredimie izói cue íadi, nai ráaredimie izói nana ráaniairi íóbidicue.

11 Coríntomo ite cue ámatiaí omoi cacai. Omoi diga báinino úriñedicue, jaca uáfodo úrifiredicue. Cue comécimo itífueña uáfodo jino ómoimo lloticue. 12 Omoína iere duéruillano rairuñeno ómoína caimare uáidofiredicue. Mei íadi omoi dinena cuena ñue izíruillana ráiruitiomoi. 13 Urue Moo, ie úruena izire jica izói, afe izói ómoína izire jicádicue. Omoimo uáfodo jino cue llua izói, afe izói omoi comécimo itífueña jino uáfodo cuemo omoi llóllena izire jicádicue.

Caade Juzíñamui illaco izóidicai

14 Juzíñamuimo ínoñedinomo dájena omoi jaináñeno iri. Omoi jaináíadi, dájena jaícina íñenafue comúideza; ómoína jiáifodo itátaite. Mei ¿nie izói jaícinaidifue fiénidifue diga dáanomo jaináírede? ¡Jaca jaináínide! ¿Mei úzefo naa jítifo diga dájena nabáírede? ¡Nabáínide! 15 ¿Táife meita Cristo diga dájena caimare írede? ¡Jaca ínide! Juzíñamuimo ínotino ínoñedino diga ¿níífue dájena íaioimo dúina? Dáanomo dúitífue íñede. 16 Mei dama Juzíñamui daína izói caade Juzíñamui illaco izóidíomoi. Afémie daide:

Iaioimo íiticue; íaioí cígido macácaiticue.

Cue be íaioí Juzíñamuiticue.

Afe izói cue comínina íitiaoi, daide.

Iemona Juzíñamui illaco jánarai diga ¿níífue dájena íaioimo dúina? Dáanomo dúitífue íñede. 17 Ie jira cai Ocuíraima bie izói daide:

Juzíñamuimo ínoñedino cígimona oni omoi jai, afénomona oni omoi ii.

Íairedifuiái dibénemo iñeno iri.

Iemona ómoína caimare uáidoiticueza.

¹⁸ Afe llezica omoí Móoiticue.

Iemo dáaruido omoí cue úruíaina fítioimoí.

Afe bífuena jamánomo riírede cai Ocuide Juzíñamui daíí daide.

7 ¹ Cue izíruiga ámatiaí, Juzíñamui jaiái uícodo lloga cáimafuiaí bie izóí joide. Afe daíí caimo íllamona nana jíáíforiede cai íaífuiaimona muiñócana izóí oni íredicai. Abi íaífuena daje izóí cai joreño íaífuena fáicanocairedicai. Juzíñamuina ñue jacíruillano cai comeci íaininafue ie eróicana jáfcina jóneredicai.

Corintio imaci comeci méidua

² ¡Mai cuena caimare omoí uáidori! Cue bie jaca buna fieni finóñedicue. Daje izóí buna íaire finóñedicue. Iemo ómoimona jaca buna jífueñedicue. ³ Bie izóí cue dáinado ómoína íaire finótañedicue. Mei nauí ómoína cue daína izóí, nai cue caana llezica, nágarui ómoímo cue comeci fáioidicueza. Uáfuena dájena cue tñilliruimo ómoímo cue comeci fáioidicueza. ⁴ Ómoína iere caimare ínoticue; daje izóí ómoíri ñue abi ínoticue. Iemona diga duere zefuállafue cuemo comuilla llezica cue comeci jaca náirede, íemo jíái jamánomo caimare iticue.

⁵ Mei daíí nauí cuemo comuídeza. Nauí Macedonia éniemo cue jailla llezica afénomo uái cue illíruí jaca íñede. Mei jíáífodo náganuaído féiredifuiái cuemo comuide. Cuena uáitatino nágafene cue ciróidíaiói, íemo diga jíáífuiaíri comécido jacínaioicaidicue. ⁶ Mei íadi comécina náinidínona náicaitafírede Juzíñamui cuemo dúecaide; cuemo dúecaillano Tito dúcinado ñue cuena náicaitade. ⁷ Daa ie dúcinari íóbiñedicueza, mei dáanomo omoí méidoga ñue illáfuedo afémiena omoí náicaitari íóbidicue. Afémie omoí iere cuena cióacanafue cuemo llote. Iemo jíái nauí omoí cígimo comuídifueri omoí iere zúunaillana Tito llote. Daje izóí cueri omoí comeci llícitaillari, naa cuemo omoí jíeruiacanari íóbidicue. Bífuíaina cue fidínamona jamánomo íóbidicue.

⁸ Mei nauí ómoímo cue orécabe ómoína zúucaitate íadi, biruí áferi zúucaíñedicue. Mei nibaí nauí áferi zúucaidicue, mei íadi biruí Tito cuemo llua izóí afebe are ómoína zúucaitañenana fidídíicue. ⁹ Iemona biruí íóbidicue. Omoí zúucaillari íóbiñedicue, mei jíáífodo afe omoí zúucaillafuedo omoí comeci ífuena méiduari íóbidicue. Bie zúucaillafue ñue omoí ocuállado Juzíñamuina íóbitade. Iemona ómoímo riire cue cüegabe ómoína fieni finóñede. ¹⁰ Mei uafue, Juzíñamui íóbilla ñue cai ocuíoiga zúucaillafuiaí cai comeci ífue ñúefuena méidotade. Iemo afe ñúefuena méiduado jíllóiticaí. Mei íadi bíniemo ite ínoñedíno zúucaillafue íaíoína ana tñillínomo úite. ¹¹ Omoímo comuide zúucaillafue ñue omoí ocuállari Juzíñamui íóbide. ¡Iemo

birui omoï cígimo ñue comuídifuiaimo omoï éroi! Afe zúucaillafue naui ómoïmo ite fiénidifue mo riire ómoïna ñue coméciitade. Iemo afe zuufue omoï finoca fiénidifue na jino uáfodo llotátate. Daje izóï afe zuufue dani ómoïna rícaitate; íemo ómoïna jacíruitade. Afe méifomo iere cuena cióacadiomoi. Afe llezica omoï cígiri ite fieni finódimiena duere finótaiacadiomoi. Nana bífuiaimo omoï nífueninana jino ñue cótatiomoi. ¹²Mei daí afe orécabe cue cuia llezica afe fieni finódimiemo figo coméciñedicue. Daje izóï duere zefuídimiemo figo coméciñedicue. Mei jáífodo ñue omoï illífuemo coméciidicue, cuemo omoï comeci ñue fáiana, Juzíñamui eróicana, omoï onóillena. Ie jira afebe ómoïmo cueticue. ¹³Iemona bífuiaido cuemo caimare dúecaídiomoi.

Mei íadi omoï cuemo dúecailla baimo Tito iere caimare íllari jamánomo ióbidicue. Mei nana omoï afémie ñue uái íllena íena canódiomoiza. ¹⁴Naui omoï dibéndo Títomo cue úrilla uai meáiruiñeno jaca ñue cuemo baite. Omoiri abí cue ínuana afémiemo lloticue. Ja birui, nana ómoïna cue daina uai uáfue na jailla izóï, afe izóï omoiri Títoma cue daina uai uáfue na jaide. Iemona naui afémiena cue daina uai táinomo omoï fáíftañenari iere ióbidicue. ¹⁵Ja birui Tito ómoïna iere izíruite, mei nana ómoïmo ie dáinado cue ocuúcafuiái jeire omoï úamo afémie caimare uibóideza. Daje izóï jacíruioicana caimare ie omoï llínuamo nai comécioida. ¹⁶Iemona ómoïna jaícina ñue cue ínuari ióbidicue.

Jeruñeno fecáredicai

8 ¹Amatiai, birui Macedonia éniemo ite Juzíñamuimo jaináidinomo afémie dúecaífirenamona íaioi jeruñeno diga raa fecáfirenafue ómoïmo llóiacadicue. ²Mei íaioimo comuide féiredifuiái iere íaioina jacire facátate íadi, caimare itíaioi. Daje izóï iere duérediaioi íadi, ráaredino izóï raana jeruñeno fecáfirediaioi. ³Mei dani íaioi comeci ñue jítaina izóï nana íaioimo ite dieze jeruñeno fecádiaioi, íemo afe íaioi írede úcube baimo nane fecáfirediaioi. Aféfuemo uaina nabáidicue. ⁴Bie Macedonia imaci Judéamo ite ámatiai íaioi canóllena cuemo izire jicádiaioi. ⁵Iaioimo comeci cue faca baimo fecáfirediaioi; mei fueñe Juzíñamui comeci jítaina izóï, “Juzíñamui ocuilla raire fínoíticai,” dainano afémiemo ñue ínotiaioi. Afe mei daje izóï “O ocuilla raire fínoíticai,” cuena daidíai. ⁶Afémaci daí daina jira, Títomo izire jicádicue, afémie naui omoï cígiri taineca omoï jeruñeno fecaca úcube iráiafue birui ñue ícoïmo fuitállena. ⁷Mei nágafuiái dibénemo iere ñue finódiomoi: ínogafue dibénemo jamánomoidiomoi. Iemo ñue llófuiana jamánomo baitádinomoidiomoi, naa ífoci úrillafuiáiri. Daje izóï ráiraieñeno íocirenafue dibénemo jamánomoidiomoi, naa cuena omoï izíruillafueri. Daí omoï íllamona, mai bie jeruñeno raana fécafue dibénemo daje izóï jamánomoidinona omoï iri.

⁸ Bie fécafueña ómoína finótañedicue. Daa jiáimaci raire raana fecáfirenafueña omoi onótaacadícue, áfena omoi fidínamona íaioi fecá dieze raire omoi fecállena. Afe daí raire omoi fecáacanádo omoi izíruillafueña jiái uáfueña dáitiomoi. ⁹ Mei cai Ocuíraima Jesucristo caimo dúecaillana ñue onódiomoiza. Afémie fueñe monamo illa llezica bínie comini ráanailla baimo jamánomo ráaredimie. Mei íadi biniemo bíllamo caina izíruillano dama abina dúeredimiena finode, ie dúerenado Juzíñamui dibénemo caina jamánomo cai ráanaitallena. Mei uáfueña, nauí Cristo monamo illa izói, afémie caina itátaiacade.

¹⁰ Bie jiáimacimo fecáfirenafue dibénemo omoi ñue íllena, cue comécimo ite cue fácaja ñuera uai llóiticue. Nauí jaide fimónamona nai biruimo afe jeruíño fécafueña ñue tainédiomoi. Daa due jiza fécaítino izói, tainéñediomoi, mei jiáifodo íocire caimare fecáfirediomoi. ¹¹ Jira benómona mai ñue ícoimo omoi fuitari. Nano fueñe omoi táinia llezica, omoi íocire caimare fecáfireña izói, afe izói áfena ñue ícoimo fuitari. Omoimo ite dieze, jeruíño fecáfireiri. ¹² Dámie uáfueña Juzíñamuimo fecáacania, afémie Juzíñamuimo fecaca raa Juzíñamui caimare llínoite. Mei uáfueña comínimo ite dieze Juzíñamui caimare llínofiredeza. Afe baimo cómemo íñédena afémie táinona jicáñede.

¹³ Jiáimaci omoi canófirenado ómoína dúeredinona finóacañedicue. ¹⁴ Mei jiáifodo illa dígazie dájerize omoi ráareri, daidícue. Jiáziena jamánomo baimo ráareri, daíñedicue. Birui íaioi jitailla raana omoi ñue fecárediomoi. Iemo uire omoi jitáilliruimo omoi jitailla raana afémaci ómoimo fecárediaioi. Afe bie izóidemoná afémaci naa ómoiri jaícina dájerize ráareitiomoi. ¹⁵ Jiaí afe monámona Juzíñamui oreca maná daina pan izóidena dibénedo Juzíñamui cuguái daje izói daí dáideza: “Aillo ofítatimiemo minícana fiébiñede. Iemo figo ofítañedimiemo ie jitaica raana íñede.” Iemona nana dájerize ráareitiomoiza.

Tito naa ie nabáñiairi

¹⁶ Ja jiáinodo Juzíñamuina “Figora” daífiredicue. Mei omoi ñue íllena ómoimo cue comeci úina izói, afe izói Juzíñamui Tito comécina ómoimo jóonetadeza. ¹⁷ Afémiemo cue jóonenocaigana afémie ñue jíruite. Iemo dama ie comeci ómoimo járitaifirenamona, ja birui dama ie comeci jítainado omoi eróizaide.

¹⁸ Tito díga daa ñue mámecina jica jalléidimiena orédícue. Nana gairífirede Juzíñamuimo jaináidínodo ie mámecei jica jalleide. Jíllona uaimo afémie iere ñue táijínado ie mámecei jica jalleide. ¹⁹ Daa bífueñedeza, mei jiáifodo Juzíñamuimo jaináidíno afe bie cai ama nizédiaioi cue díga jáillena. Daje izói cue canóllena afe ñue ínotimiena nizédiaioi. Afe jiáimacimo omoi dúecaille úcube cue fecállemo afémie cuena cánoite. Cai Ocuíraimamo ñuera uai nitállena bie izói finódicue.

Daje izói íemo jíái omoi íocire comínina canóacanána ácatallena, bie izói mamédicue. ²⁰Bie úcube cue iráiamo buna fieni úriñeillena bie izói finódicue. ²¹Bie izói ñue jaícina uáfodo canóacadicue, Juzíñamui eróicana ñue cue íllena. Dama Juzíñamui eróicana daíí íñédicueza, daje izói jíái comini eróicana daíí iticue.

²²Afe íaillinoído jíáie cai izói ínote ámatiaimona dáamie orédicai. Afémie íocire ie mamérellana diga jíáifuiaído ácatate. Iemo birui ómoimo iere ñue ie ínuado, ie íocire mamérellana jamánomo jino ácatate. ²³Daa come “¿Mei bu Títona?” daííadi, “Jadíe omoi cue cánuamo cue nabáífredimie,” omoi daííri. Iemo afe Títodo jaide íaillinoímo comini jícanoíadi, “Cristomo jaináidinomona orécaiaillinoí,” omoi daííri. Afe llezica “Bie come íaillinoí ñúefue Crístomo nitáfirediaillinoí,” omoi daííri. ²⁴Iemona bie oreca íaioímo, uáfueña íaioína omoi izíruífirenana ñue íaioímo ácatari, nana Juzíñamuímo jaináidino onóilleza. Afe izói bie orécamací ñue omoi llínuado, ómoído abí cue ínuana, uafue daíítaitiomoi.

Amatiai íena úcube iráica

9 ¹Juzíñamuímo ínotino, cai ámatiai izóidino íaioíena úcube iráia díbenedo, ómoímo uáfueña cúenidicue, ²mei omoi fecállena raire mamérfirenana ñue onódicueza. Omoi Acaya énie imácidiomoi. Nauide fimónamona omoi fecalle raamo raire mamérfirenana Macedonia énie comínimo jaca caímare llófredicue. Macedonia comínimona nabézie, omoi íocire mamérellana fidíillamona comécido náicaidiaioí. ³Mei íadi bie úcube iráia díbenedo ómoído cue lloga ñúefue táinomo fáífiñeillena, bie cai ámatiai ómoímo orédicue. Daíí íaioína uécodo orédicue, navi cue daina izói áfemo ñue omoi finóbillena. ⁴Macedonia imácimona dárie cuedo jaia, nai omoi finóbiñenana baizájillena gáíñedicue. Daíí omoi íllana íaioí baizájiadi, afe cuena meáidaitade, mei áfedo nano uécodo omoi ñue cue ínuana táinomo fáífitaitiomoi. Iemo jíái afémaci daíí omoi íllana cóicaizaíbiadi daje izói dani ómoína meáidaitaite. ⁵Afe bíemona nano uécodo ómoímo bie cai ámatiai cue orelle iere jítaíredeza, daíí comeci facádicue. Iemo daje izói afémaci navi uécodo omoi mameca aillo úcube iráiana ñue ícoímo fúitana cánoítiaioí. Bimaci omoi cánuamona afe úcube iráiana fúitano, afe úcube caímare omoi fecállemo ñue finóbitiomoi. Iemona afe omoi fecalle cue riire ocuínidicue. Dani omoi comeci ñue jítainana ácataitiomoi.

⁶Ja cue llollífuemo omoi uibíoiri. Due ritímie jaca due jofo ote. Iemo daje izói aillo ritímie aillo jofo ote. ⁷Ie jira illa dígamie ie comeci caímare mamérilla izói ie úcube írede. Jeruíllano éoinamona fecánide. Daje izói jíáíma ocuóillamona ínide. Mei Juzíñamui caímare fecáfiredimíena izíruíteza. ⁸Cai Moo Juzíñamuímo nana jíáífoide omoi cáimacaitade

rániai iere aillo íteza, facádoñeno jamánomo ómoimo fecárede. Daií nana dani omoi jitaica ráaniaina ómoimo nágarui ífireite. Mei íadi dani ómoieñedeza, mei jiáifodo ómoimo aillo ite ráamona, nana jiáiforiede raado jiáimacina jeruñeno canórediomoi. ⁹Juzíñamui Cuegáuai bie izói daide:

Dúeredinomo afémie jeruñeno aillo fecade.

Comínimo afémie ñue finócano jaca are iite.

¹⁰Iemo afe daade Juzíñamui omoi ríllena jiáie ríamo llizítano ómoimo fecáfirede. Daje izói afe riga zícuacona, Juzíñamui áfemona omoi güille raana comúitano ómoimo fecáfirede. Iemona nana omoi jitailla ríllena afémie ómoimo fécaite; íemo dáanomo omoi rigánuiaina jamánomo aitátaite; áillamona jamánomo aillo óitiomoi. Daií omoi jamánomo óllemona jiáimaci canolle raa diga icaño ómoimo íteza. ¹¹Afemona diga jiáiforiedena ráareitiomoi, jiáimacimo jeruñeno aillo omoi fecáfirellena. Iemo cue uire omoi orelle úcube cue izájillamona jiáie cai ámatiaína Juzíñamuina “Tere figura” dáitaite. ¹²Mei jira afe bie cánua Jerusalemo ite cai ámatiaímo cai feca llezica, daa íaioi jitaica ráaniai íaioímo fecáñedicaíza, mei íadi afémacina Juzíñamuina “Tere figura” daítaticai. ¹³Iemona dani afémaci Juzíñamuido ñue úritiaíoi, mei bie cánua Cristo ñuera uaina omoi jíeruillana íaioímo jino ácatate. Daje izói afémacimo íemo naa jiáimacimo jeruñeno aillo omoi fécajana íaioi ciónamona, Juzíñamuimo ñuera uaina jóneitiaíoi. ¹⁴Iemona ómoína iere duéruillano, afémaci afe íbana ómoíena Juzíñamuimo jícaitiaíoi. Juzíñamui ómoído jino ciotaga aillo dúcaifirenamona afémaci ómoído Juzíñamuimo úrifireitiaíoi. ¹⁵Ie jira Juzíñamui afe caimo lloga áillo dúcaifirenana jamánomo ñuénamona, fia iga raa izóideza, áfena jino uaido jaícina llónidicaíza. Afe caimo dúcaifirenari Juzíñamuina “Tere figura” mai cai daiíli.

Cristo orécamierna íllamona Pablo ocuilla rño ite

10 ¹Cue Páblodicue. Cristo caimo dúcaifiredeza, íemo jiái afémie iere cáimamieza cue daje izói izire ómoímo jícaiticue. Omoimo riire cue úrizabiñeíllena ja birui jícadícue. Dáarie cuena uáitatino bie izói cue dibénedo daiífirediaíoi: “Pablo omoi cígiri illa llezica afémie iere comécina mánaidímie, mei íadi afémie jica jiáínomo illa llezica afémie abído riire ocuídímiena dóbaicaide,” daidíaíoi. ²Mei jiáifodo, omoi cue erózaíbillla llezica, rírede uaina ómoímo cue úrizabiñeíllena izire jícadícue. Mei ómoímona dáarie cuemo fiénide uai jítadino ite. Afe íaioi jítaca uai bie izói joide: “Nana ie finócano daa bínie comini jítaina izói finoca,” daií daidíaíoi. Iemona afémaci cue úritaja, rírede uáillaido íaioímo úriredícue. Mei íadi afe izói cuena úritaño iri. ³Mei uáfueza, ua cómedícue, mei íadi bínie comini fuirífirena izói fuiríñedícue. ⁴Fiénidífuiaí oni cue caitalle raa, bínie comini

fuirilla raa izóinède. Mei jiáifodo cue fuirilla raa Juzíñamui ríinona ríinorede, abi ríidollena riire finócacuai izóidena cue táinocaitallena. ⁵Mei áfedo cuemo fieni jitácana oni caitádicue; daje izói cuena íaioi cáitajana oni féitaticue. Nana uáitaiacadino íaioi abi íinuano jiáimaci Juzíñamuina raire onóñeillena jízitafirediaioi. Ie jira nana íaioi comeci faca uaillai Cristo anamo itátaticue, afe Crístona íaioi comeci jíeruillena. ⁶Cue llógana omoi jíeruilla ñue ícoimo dúciille llezica, nana jiáie uáitafiredinona duere fínoiticue, íaioi jíeruñena ícoinia.

⁷Daa jínofene cioide ráaniaimo eróidiomoi; uáfueza, náinidimiena cue eróinamo eróidiomoi. Ninó dámie “Uáfueza cue bie Cristo iédicue,” daiíadi, bífuego afémie úbicaitarede: Cristo íena ie illa izói, daje izói cue Cristo iédicue. ⁸Mei diga icaño, cuemo ite ríinodo cue llóiaíadi nai áferi méaidaiñeiticue. Mei cai Ocuíraíma afe ríino cuemo jónete, áfedo Juzíñamui díbénemo ñue omoi cue móonaitallena. Omoi niné cue táinocaitallena cuemo ñnega. ⁹Fia rabedo ómoína jácidotímie izói íacañedicue. ¹⁰Dárie cue cuezábiaido daidíaioi: “Jamánomo riire ocuífiredi; mei íadi afémie comini eróicana úrilla llezica, afémie ríimieñede. Afe llezica ie úrilla uaina iere jáimairuirede,” daidíaioi. ¹¹Afe izói úritímie bie izói onótarede: Jicana rabedo riire cue úrilla izói, afe izói omoi cígiri cue ille llezica riire úriticue. Nane afe dáaruído afémacina riire ócuiticue.

¹²Afémacimona dáarie dani íaioiéna ñue caimare úritiaioi. Táinomo abi íinuado úritiaioi. Afémaci illa izói jaca mamériñedicue. Dani táinomo íaioi comécíillado conímamo comécíidiaioi. Ñuera come daiíllena dani conímamo facádiaioi. Daií fácajamona abina onóñedimacina jáidiaioi. ¹³Cuemo dúíñede raado abina íinoñeiticue, uai cue llócaillena mózizaillinona llotímie, Juzíñamui. Afémie ñuera uaillai cue llócaillena omoi illánomo cuena dúcitate. Uáfueza Corinto dinomo cuena jáítate. ¹⁴Ie jira cuemo dúide táijinafue baimo jáiñedicue. Mei nauí Cristo ñúefue fueñe ómoímo jino dénuaiíticueza. Iemona afe omoi cígiri cue táijille cuemo dúide. Nano fueñe lluaíbiñedicuenia afe táijille cuemo dúíñede; mei íadi daiítañede. ¹⁵Jiáimaci táijinana cúeiena abimo maiñóñedicue. Afedo abina íinoñedicue. Mei jiáifodo Juzíñamuimo omoi ínogafue ñue móonaille dinori, omoi cígiri jamánomo cue táijillemo ocuúridicue. Mei íadi cuemo dúide táijinafuedo táijifireiticue. ¹⁶Iemona afe méifomo omoi illa batífenemo jica itínomo jíllona uai llujíredicue. Mei íadi afe llezica jiáíma taineca táijinamo táijíñeiticue, ie táijinado abí cue íinoñeillena.

¹⁷Mei jiáifodo daa come abí ínoiacania, cai Ocuíraímado abí ínoiteza. ¹⁸Dama ie abido ñue úritímie, ñuera come daiífirenamiéna jáíñeite; mei jiáifodo daa Juzíñamui ñue úrillamie, ñuera come daínamiéna jaille.

Cristo óreñega taino llotino Pablo diga

11 ¹Abina onóñedímie izói due jiza úriticueza. Raire cue uai oñoño fíaicana cue úrillamo ómoína cacáretaacadíicue. Mai

fñaicana abí cue fñnuamo omoi cácarei. ²Omoína iere uríoifiredicue. Afe omoi cue uríoilla Juzíñamuimona comuide. Dámie ie áreiacania jétañega jitaingo óllena jica ia mámano jicánote. Afe jicánogango daa afémiemo iníreirede. Mamécaruimo afengo moo aféngona izájite. Afe izói Crístomo ómoína cue izájillena ja Crístodo mamédicue. Ie jira ómoiri iere uríoídícue. ³Mei comini nánoidingo Evana jaio bífuiano jífua izói, afe izói jiáimaci ómoína bífuiana jacáruiticue. Afemona figo abí omoi ráiruiñenia jífuefitiomoi. Iemona Crístomo ñuera comécido omoi comécillana oni jiáifodo féitaitiaioi. Daje izói Crístona nahí omoi izíruillana féitaitiaioi. Afena jacáruiticue. ⁴Cue llócaiga Jesús izóiñedimena ómoimo llotiaioi. Afemo fñaicana caimare ñue cacáreidiomoi. Afemo nibai omoi fñnollena jacáruiticue. Iemo nauí ómoimo cue lloga o maiñoca Ñuera Joreño izóiñedena jiáifoide joréñona abimo maiñódiomoi. Iemo jiái úcodo cúemona omoi cacana ua jíllona uai izóiñedena jiáifoide uai jeire otíomoi. ⁵Birui baie omoi cígido jáillamaci “Cai bie Cristo orécamaci baimo ñuemacidicai,” daidíaioi. Mei íadi afémaci jofófenemo ráifñedimiedicue, daí comécioídícue. Iemona ñnibái mei cuemo cacáreñeitiomoi? ⁶Mei nibai cue úrilla uai figo jñoñeniadi, nai cue onoiga rafue jino llúana dibénedo iere baitádimiedicue. Nana ómoimo cue llócaillado afe bie cue onóigafuiaina jaca nágarui jino ómoimo ácatafiredicue.

⁷Jíllona uai ómoimo rainóñeno cue llúado, omoi anamo cue abina itátaticue. Daí iticue cue baimo ñúefuedo omoi jalléllena. Daí cue illa ñnibai fiénide? Daiñañede. ⁸Jiáie Juzíñamuimo jaináidino omoi cue canolle úcube ibádiaioi. Omoi cígiri cue íllena afe úcube cue llínuva afémacimona cue bairoca izoide. ⁹Omoi cígiri cue illa llezica, cue jitaica raana ite. Mei íadi áfena jaca ómoimona rainóñedicue. Aféruillaido Macedóniamona bite cai ámatiai, cuemo íñede raana fecádiaioi. Afe daí cue abina rairúdicue, omoi cígimo nana cue finócafuiái ómoimo juare zúñeillena. Iemo nauí cue illa izói, afe izói omoi cígiri jaca daí ífíreiticue. ¹⁰Cristo ñúefue ua cue onona izói, afe izói nane jiáifuena ua onódicue. Afefue bie izói daide: Nana Acaya éñiedo rainóñeno tájifíreiticue. Afe cue tájina cue rainóñenari cáimacaiticue. Iemo afe cuemo ite cáimafue buna cúemona báiroñeite. Afena uáfodo onódicueza. ¹¹¿Ñnibái mei daí úriticue? ¿Ñnibai ómoína cue gáñenado daí úriticue? íleñede! Omoína iere cue gáñana Juzíñamui ñue onode. ¹²Mei íadi jaca cue fñnuva izói finócaíticue, cuena uáitatino abí fñnotañeillena. Jaca ómoimo rainóñeno tájifíreiticue, baie abí fñnotino íaioi abí fñnuva raa cue bairóllena. Afémaci úcubena ómoimona izire jicáfírediaioi Cristo ua orécamiena cue illa izói íaioi íllena. Mei úcube íaioi ófírenamo fñnotiaioiza, áfedo “Cristo orécanodicaí” daíllena. Ie jira afe íaioi fñnoga uai oni caitácadicue. Iemona jaca rainóñeno ómoína canófireitícue.

13 Baie afémaci Cristo óreñega iere taino llotino. Daje izói afémaci jiáimacina jífuefiredino. Iemo jiái afémaci come jifeia jiáifo eroina izói, Cristo orécamacina comínina íaioimo coméciitaacadiaioi. 14 Afe bie jiáifodo afémaci eróinafue cáimona jánaiñede, mei dama Taife egáñote Juzíñamui abi ímiena eróillena méidoficaideza. 15 Ie jira, Taifemo táijitagano ie méidoficailla izói méidoficaifirediaioi; afe jiáifoide raa ízoíñede. Iemona jifeide come eroina izói bimaci ñue ite comínina eróillena abina jiáifodo méidotiaioi. Mei íadi íaioi finócaiga fiénidifue dúina dieze afémaci táinocaitiaioi.

Cristo orécamierna ie íllamona Pablo duere zefuide

16 Nane dáanomo ómoína dáititue: Bie jabo abi cue ínuamona cue úrillamona bu cuena “Uáiritaidimiedio” daiñeno iri. Mei íadi daa come daií comécido daiíadi, dama uáiritaidimie izói úriticueza fia omoi eroiri, áfedo jabo abí cue ínollena. 17 Afe bie abí cue ínuua uaina, cai Ocuíraimamo ite rínodo cuena daií daiñañede. Mei jiáifodo dama uáiritaidimie izói úriticueza. 18 Mei dani íaioi daina ñuera uaido abí ínotinuiái aillo íteza; afe íaioi taino abi ínuana izói, afe izói abi ínoititue. 19 Omoi zánvano dáititue, omoi jamánomo baitádinodiomoiza, mai uáiritaidimie izói cue úrillamo caimare ffaicana omoi cácarei. 20 Mei ómoína baie riire táijitatina caimare ffaicana cacáreidiomoi. Iemo jiái ómoimo ite raana báiruaíbitino uaimo caimare ffaicana cacáreidiomoi. Iemo jiái ómoína námataíbitino uaimo ffaicana caimare cacáreidiomoi. Iemo jiái omoi jámairuitinomo caimare cacáreifirediomoi. Iemo omoi uíecona fatade izóidino, afe ñií ómoína fieni úritinomo ffaicana caimare cacáreidiomoi. 21 Bie izói cue daina cuena meáiruitade, mei íadi dama cue jámairuillado dáititue, cue bie afémaci ínuua izói, cue finóllena figo rínidicue.

Mei íadi aillo jiáie comini jacíruiñeno daiífirina izói, cue jiái jacíruiñeno dáititue, mei íadi áfedo uáiritaidimie izói úriticue. 22 ¿Meita afémaci hebreo imaci? Cue jiái daje izóidicue. ¿Meita afémaci Israel nairai íediaioi? Cue jiái daje izóidicue. ¿Meita afémaci Abrahámona comuídino? Cue jiái afémaci izóidicue. 23 ¿Meita afémaci Cristo táijitagano? Cue bie afémaci baimo Cristo ocuícamedicue. (Bie izói cue dáinado uáiritaidimie izói úriticue.) Cue bie afémaci baimo jamánomo táijidicue. Cue bie afémaci baimo zéchedogacue. Daje izói afémaci baimo llavécacue. Iemo diga ícaíño titáacagacue. 24 Cinco dígcacíño judío nairai duere cue ínuua llezica, cuena zechénotadiaioi. Nágari duere cue íaioi ínuua dáruido treinta y nueve dígcacíño cuena zechénotiaioi. 25 Iemo dacacíñoámani cuena ragüízido fatíaioi. Iemo dacacíño noffiaina cuena nñidiaioi. Iemo dacacíñoámani cue jailla áillue nocáe buide. Iemo dacacíño cai buíllamona daa ñaio daa mona diga afórede monaillai cígimo iticue.

²⁶Dáanori uái iñeno iere macáfiredicue. Iemo diga imani jacíredinuiaimo iticue, íemo jacírede merírfiredino cígimo iticue, íemo dama cue comíniri jacíredifuiái cígiri iticue naa jicánemaciri. Iemo áillue jofue cígimo ite jacíredifuiái cígimo iticue. Daje izói áillue nairai jinomo ite jacíredifuiái cígimo iticue, íemo jiái monáillaimo jaci cácadicue. Iemo jiái taino ámatiaí cígimo jaci cácadicue. ²⁷Daje izói juárede táijinamo iticue naa féiredifuiairi. Diga ícaíño mona nairo diga iníñeno táijidicue. Daje izói iere jufi cácadicue, íemo jiái jainoi inénari duere zefuídicue. Diga ícaíño Juzíñamuimo começi fácano güiñeno jáicadicue. Daje izói rólliemo duere zefuídicue. Daje izói incuíronino jáicadicue.

²⁸Nane bífuiai baímo jiáifuiái cuemo comuide. Nágaruillaido náganuiaimo ite Juzíñamuimo jaináidinomo cue começi úicaide. Iaiöina abíoidicue izói duere zefuídicue. ²⁹Iemona daa come figo Juzíñamuimo ie íñoñenamona duere zefuádi, afe cuena duere zefuitate. Daje izói dámie íaifuemo começi nine féiacaniadi, cue começi niné féizaila izoide. Iemona afe cuena meáidaitade; daje izói cuena ríicaitade. ³⁰Mei afémaci táinodo cuena abí ínotaadi bie izói dáititue: Cue mairíñenana jino ácatate raado ñue cue úrillena baímo gáidicue. ³¹Cai Moo Juzíñamui bie cue daína ua uaina onode. Afémie cai Ocuíraíma Jesucristo Moo; íemo jiái afémie jaca ninomo ióbioitargaza. ³²Nauí Damáscomo cue illa llezica afe nairai jabóidíllaima naga nazemo úiñorainina jónete, llaitada cue llavéllena. Afe nairai nahíllaima Areta mámeciredimie. ³³Mei íadi jiáie Juzíñamuimo ínotino, eróirafomona cirígaido cuena ana agüñetiaioi; mei afe jofue onífene cirínua raa caífo jicado íteza. Daíí afémacimona botada jíllodicue.

Juzíñamui Páblomo nicai anado ua ráfuedo úrite

12 ¹Dámie dama abido caimare úria minícana oñede. Ie úrilla jiáie raamo ráífiñede. Afefue ñue onódicue ia, cai Ocuíraíma nicai anado cuemo ácataga raa jino llóredicue. Afe llezica uícodo nai buna ónoñegafuiái cuemo llote. ²Afe cuemo ácataruimona ja catorce fimona jaide. Aféruimo Crístomo cue jaináinamona caífo tercera monamo Jesucristo illámonamo uigacue. Onóñegaza nibai caana abido uigacue, nibai íeizinino uigacue. Afe dama Juzíñamui onoiga. ³Cue úinaruimo nibai abí diga uigacue, nibai daa cue joreño úina, áfena onóñedicueza; dama Juzíñamui onoiga. ⁴Juzíñamuimo ínote tíidino jáillinomo uigacue. Afénomo Juzíñamuimona dama cuemo duide ebírede uáillaina cacádicue; afe uáillaido Juzíñamui rairuídeza birui úrinidicue. ⁵Afe cuemo ácataga raado abína ínoredicue, mei íadi áfedo abína íñoñeiticue. Dama cue abína íñoñeiticue. Mei jiáífodo cue mairíñenado ñue cue úrillena iere gáidicue. ⁶Mei dama abido cue úriacaniadi, afe abína onóñeno úrilla izóiñede, mei jaícina uáfueña úriticue. Mei íadi áfedo úriñeiticue, mei

cue ciona izói comini cuemo coméciillena jitáidicueza. Afe izói cúemona íaioi cacana izói áfeze cuemo íaioi coméciillena jitáidicue. Afe baimo aillo jíáiforie cuemo íaioi coméciillena jítañedicue.

⁷Afe cuemo jino onótaga raa iere jamánomo ebire cioide. Ie jira áfedo jamánomo abina cue fínoñellena, duere zefuítagacue. Afe duere cue zefuilla come abimo eedo llúina izoide. Afe eedo, Taife come izi cácatate raa izói, cuena duere fínuaibite. ⁸Bie duere cue zefuilla raa cai Ocuíraima oni oréllena dacaiñoámani íemo jícadicue. ⁹Mei íadi cai Ocuíraima cuena daide: Cuemo ite o cue cáimadofirena nana omo comuide duere zefuilla o ocuúllena ñue cánoite. Mei daa come náinina llezica, cuemo ite ñuera ríno afémiedo ñue jino ácatarede,” daide. Ie jira cuena náinitade raari íóbidicue, afe daíí Crísto ite ríno cuedo jino ácatallena. ¹⁰Mei jira cue náininari íóbidicue, íemo comini cuena báñuari íóbidicue. Daje izói raana cue jítaillari íóbidicue. Afe izói cue duere íaioi finóacanari íóbidicue. Iemo Crísto ícoinia féiredifuiái cuemo comuúllari íóbidicue. Mei jamánomo íaioi cuena uáitaacana llezica, afe llezica Juzíñamui cue cánuado comécina jamánomo íociredimiena jíadicueza.

Coríntomo ite Juzíñamuimo jaináidinomo Pablo comeci úcaifirede

¹¹Dama cue abi ífuedo cue úricaillamona uáiritaidimiena jáidicue; mei íadi daíí cue úrillena cuena ocufoide izói itíomoi. Mei dani omoi ja birui cuedo ñue úrrediomoi; mei ráifñedicue ia, omoi cígido jaide Crísto óreñega jamánomoidino jofófenemo ráifñedicueza. ¹²Nauí omoi cígido járitaiñeno fíaicana táijidicue. Afe cue táijicaillaruijimo jíáiena onótate raana finódicue naa cíorainina ráaniairi. Afe dáaruido ebire cáimacaitate ráaniaina finódicue, nana bífuiaido Crísto ua orécamiedicue daííllena. ¹³Jíáie Jesumo jaináidino cígiri cue illa llezica, cue jitaica raana raiñódicue; mei íadi omoi cígiri afe izói inédicue. Daa bífuedo jíáie fínotino jofófenemo ómoimo coméciidicue. Afe ómoimo cue raiñóñena dibénedo ómoimo fieni cacáiadi áfemona meine caimare cue uáidori.

¹⁴Ja birui dacaiñoámani omoi cue eróizaibillena finóbidicue. Iemo omoi cígimo cue íllena ómoimo juare fínoñeiticue; mei ómoimo ite úcube cúeiena máñuaibiñeiticueza. Mei jíáífodo dani omoi Juzíñamuimo ñue jaináitallena bíititue. Mei uafue, éicomini úruiai fena úcubena ofítarena. Uruiai ie moo fena ofítanide. ¹⁵Omoi comeci ñue íllena dama cuemo ite diga caimare fúitaiticue. Daje izói ómoiri cuemo ite máriena jeruíñeno fúitaiticue. Omoína jamánomo cue izíruiadi ¿afe íbana meita omoi jofófenemo cuena izíruiarediomoi? Daíítañede mei íadi birui afe izói ómoimona dáarie cuena daíí finódiaioi.

¹⁶Nana ómoína cue llótaihuaibiñedicue. Afena ñue fairíotiomoi; mei íadi afe méifomo dámierie jíáífodo daidíaioi: “Irebaimo jíita izói caína bífuiano úcube ote,” daidíaioi. ¹⁷Nauí ómoimo cue orécamacimona,

¿meita cuemo izájillena dámie ómoína bífuiano úcube ote? ¡Oñede!
 18 Omoi méiñuaillena Tito izire jicádícue. Afémiedo daa jiáie ama
 orédícue. ¿Meita afe Tito úcube óllena ómoína jífuete? ¡Daiñañede! Tito,
 ie nabai, íemo cue, cue macáfírena izói, daje izói nana macádícai, ¿ero
 ua? Dájena ñue comécíillado táijífiredícaiza, ¿ero ua?

19 “Caido abi ríidotio,” nibai caina comécido daidíomoi. Mei íadi afe
 izói jóiñede. Mei jiáífodo Juzíñamui eróicana Crístomo jaináitagamie
 izói úritícai. Mei cue izíruiga ámatiaidiomoiza, nana bie izói cue daina
 omoi comeci Juzíñamui dibénedo ñue móonaillena llotícue. 20 Mei omoi
 diné cue bille llezica cue comeci óiacana izói inédiomoi cue cóizaibillena
 jacíruitícue. Iemo afe íbana omoi comeci óiacana izói inédícue cue
 omoi baizájillena jacíruitícue. Iemo dájena ñue omoi jaináñenamoi
 jacíruitícue. Daje izói omoi íiradoifírenamoi jacíruitícue; íemo jiáimana
 omoi ícífírenamoi jacíruitícue. Iemo afe llezica jiáimana duéruíñeno dani
 abí omoi úcificaiillari jacíruitícue. Iemo jiáima uaita uai omoi llófirenari
 jacíruitícue. Iemo jiáimaci jánari omoi úrifírenari jacíruitícue. Daje
 izói fieni abí omoi ínofírenari jacíruitícue. Iemo ocuícana náfueñedino
 izói fieni ebena omoi ífirenari jacíruitícue. 21 Iemo jiái ure omoi
 cue éroizaibille llezica omoi daíí íllari cue Juzíñamui ómoído cuena
 meáidaitalleri jacíruitícue. Iemo afe llezica nibai aillo ómoíri cue éeíari
 jacíruitícue, mei jaiái ninómona díga fiénidífuíai omoi fínuari éedicueza.
 Mei ómoímona aillo nai íaíoímo ite íaífuíai féitañediaíoiza. Daje izói
 íaíoímo ite jírúífuena fáicanocaiñediaíoí, íemo íaíoí comécina jírioi
 fieni finócafuíai oni nine féitañediaíoí.

Pablo fíraicaiño íaíoí uáidua uai, íaíoímo llonódacaiga uai díga lloste

13 1 Naui ménacaiño omoi méiñuaidícue. Ja birui nane meine
 omoi méiñuaibítícue. Onódiomoiza, naga júfidoga rafue mena,
 nibai daámami uai nabáiraini daje izói úriadi, afe júfidogafue ñue záide.
 2 Naui méífodo omoi cue méiñuaibilla llezica, nana naui uícodo fieni
 itínona duere cue finóllena llonódacaidícue. Birui benó jica cue illa
 llezica dáanomo naui ómoína dama cue dánana llóitícue: “Uire nane
 omoi cue méiñuaibia naui uícodo fieni itínona naa ómoíri dúecaiñeno
 duere fínoitícue,” daidícue. 3 Iemona omoi jenoca Cristo cuedo úrilla
 onótafírena raana ñue ónoitiomoi, mei áfena jenófirediomoiza. Omoíri
 Cristo náinidímie izóiñedeza, afémie ríinorede, Cristo omoi díga
 jífánoñedeza, ríiredímieza. Omoína ñue rairuíoide. Omoi cígíri íemo
 ite ríino jino cótate. 4 Uáfueza, Cristo náinidímie izói cruzmo coraíca,
 mei íadi birui afémie Juzíñamui ríinodo caade. Afe daíí Cristo náinina
 izói dájena náinidícue, mei íadi dájena afémiemo cai jaináíllado
 Juzíñamui ríinodo íitícue, omoi ñue cue finófireillena. 5 Mai dani ñue
 abina omoi onoiri. Afemo, mai ñue comeci omoi facari, Juzíñamuimo

ñue ñinoga uai iere jeire omoi úana omoi onóillena. Omoi comeci ifue facada ñue jóonefireiri. Jesucristo ómoiri íllamo ¿meita áfemo comeciñediomoi? Mei nibai jíáifodo jóide. ¿Meita táinona ñinotiomoi? ¡Afe daií ññeiteza! ⁶Mei uáfueza, cai bie táinona llotímieñedicue. Afemo ñue omoi comeciocaillemo ocuáridicue. ⁷Iemo afe llezica fíenidifue omoi fínoñellena Juzíñamuimo jicáfiredicue. Daa ñúefue dibénemo omoi íllena jicádicue. Mei íadi ñue jaícina llófuefiredimie cuena daiíllena jicáñedicue. Dámie “Jaícina lloñéðio” dáiiadi áfena llóñeiticue. Ñúefuemo omoi ille comini cueri dáinana baimo ráifide. ⁸Jaca ua uai jeire omoi oíadi úaitañeiticue; ómoína lletánidicue. Mei jíáifodo afe uaina nabáiredicue. ⁹Ie jira ómoína cue lletáninamona nánina cue cíoiadi, áferi caimare ióbidicue, mei afe llezica omoi ñue comécina náirediomoiza. Iemo nífuenino ñue jaícina omoi íllena jaca jicáoifireiticue. ¹⁰Nai omoi cue méiñuaibiñena llezica, bibe úcodo ómoímo cueticue, uire ómoímo cue bíadi omoi diga riire cue ññeillena. Uáfueza, omoi riire cue lletalle ríno Juzíñamui cuemo iga. Mei íadi omoi cue táinocaitallena cuemo ññega. Mei jíáifodo Juzíñamui dibénemo omoi comeci ñue cue móonaitallena cuemo iga.

¹¹Cue ámatiaí, ñue íitiomoiza. Dani nífuenino jaícina omoi illínomo omoi comeciiri. Bie ómoímo cue lloga uai náfuiano, conímana omoi náicaitafireiri. Conímamo dájerize caimare omoi comeciifireiri. Daje izóí jíái dájena ñue uái illífuemo omoi iri. Iemo cai uái illifue comúitate Juzíñamui omoi diga ífireite, íemo ómoína ie izíruifirenana ónoitiomoi. ¹²Caimare conímana omoi uáidori. ¹³Nana benó ite dájena Juzíñamuimo ñnote cai ámatiaí ómoímo uai orédiaíoi.

¹⁴Ja birui cai Ocuáraíma ómoína ñue fñoiteza. Daje izóí Juzíñamui ómoína izíruifireiteza. Iemo Ñuera Joreño ómoína nabáioicaiteza. Daiítadeza. Jae niie.